



Melaka sasar RM500 juta pelaburan sepanjang EXPO Dubai 2020

Oleh Amir Mamat - Februari 16, 2022 @ 4:32pm
bhnews@bh.com.my



Ketua Menteri Melaka, Datuk Seri Sulaiman Md Ali (tengah) pada sidang media sempena Pra Pelancaran Melaka Week @EXPO Dubai 2020, di Seri Negeri, hari ini. NSTP/AMIR MAMAT

AYER KEROH: Kerajaan Melaka menasarkankan untuk menarik pelaburan bernilai RM500 juta ke negeri itu sepanjang tempoh penyertaan ke EXPO Dubai 2020, bermula 13 hingga 19 Mac ini.

Ketua Menteri, Datuk Seri Sulaiman Md Ali, berkata sasaran itu sejajar dengan beberapa pengisian program yang sudah disusun sepanjang Minggu Melaka pada expo yang bertemakan Memperkasa Kemampanan itu.

Beliau berkata, lima acara menandatangani memorandum persefahaman (MoU), lapan forum serta lebih 30 padanan perniagaan akan berlangsung sepanjang penyertaan Melaka pada expo berkenaan.

"Kita juga dijangka mengadakan lawatan ke beberapa Pavilion negara lain seperti Pavilion Emiriah Arab Bersatu (UAE), Arab Saudi, Amerika Syarikat dan Sweden.

"Serentak itu, kita juga akan mengadakan perbincangan dan lawatan ke Sharjah Research Technology and Innovation Park, Dubai Global Village Management dan beberapa syarikat terkemuka di UAE," katanya pada sidang media sempena prapelancongan Melaka Week @EXPO Dubai 2020 di Seri Negeri di sini, hari ini.

Yang turut hadir, Setiausaha Kerajaan Negeri, Datuk Zaidi Johari dan EXCO Kanan Pelaburan, Perindustrian, Pembangunan Koperasi dan Usahawan negeri, Datuk Seri Ab Rauf Yusoh.

Sulaiman berkata, Melaka adalah antara negeri yang diberikan slot khas oleh Kementerian Sains dan Teknologi (MOSTI) pada minggu keempat, selain Pulau Pinang, Johor, Pahang, Sabah dan Selangor.

Katanya, untuk tujuan itu, Unit Perancang Ekonomi Negeri (UPEN) dilantik sebagai urusetia utama expo dan dibantu Invest Melaka serta Lembaga Pembangunan Pelaburan Malaysia (MIDA) selaku urusetia bersama.

"Pengisian program Dubai EXPO 2020 Melaka Week adalah berasaskan kepada visi Melaka Menuju Negeri Lestari iaitu pameran konsep Melaka Rumahku: Menuju Negeri Lestari dengan mempamerkan Pelan Pembangunan Hala Tuju Melaka Lestari (Pelan Strategik Melakaku Maju Jaya 2035).

"Ia selaras dengan 17 Matlamat Pembangunan Lestari yang berasaskan lima misi iaitu Teknologi, Entrepreneurship, Revolusi Industri dan Ekonomi, Antarabangsa, serta Sejahtera (TERAS)," katanya.

Mengulas lanjut, katanya, antara perkara yang akan diketengahkan kerajaan negeri sempena expo itu adalah inisiatif pelaksanaan Zon Ekonomi Melaka Waterfront (M-WEZ), selain sektor industri, pelabuhan antarabangsa, pelancongan, Perusahaan Kecil dan Sederhana (PKS), Melaka Pintar dan Inisiatif Hijau, pertanian dan bioteknologi serta pengurusan sumber air.

"Sebanyak 11 agensi dan syarikat berkaitan kerajaan (GLC) akan menyertai delegasi Melaka ke EXPO Dubai 2020, antaranya Invest Melaka, MIDA, Perbadanan M-WEZ, Perbadanan Kemajuan Negeri Melaka (PKNM), Tourism Melaka, Badan Kawal Selia Air

(BKSA), Perbadanan Teknologi Hijau Melaka (PTHM), Perbadanan Bioteknologi Melaka, Kumpulan Melaka Berhad, Jabatan Pertanian Melaka dan Melaka ICT Holdings Sdn Bhd.

"Sebanyak 16 syarikat PKS juga akan sertai bagi mempromosikan produk keluaran Melaka di sana kelak," katanya.